

百宋樓藏書志

陌米樓藏書志卷一百六

存齋雜纂之六

歸安陸心源剛甫編

集部

別集類四十

居竹軒集四卷

文瀾閣傳鈔本

元成廷珪撰

句曲外史貞居先生詩集五卷

舊鈔本 黃蕘園舊藏

元

吳郡海昌張雨伯雨撰浙江鄉貢進士姪誼

編類

黃氏手跋曰此句曲外史詩係子友金心山所

蓄者心山爲吳庠生與予同與歲科試因相識
焉然但知其能文而餘所善則未之知也後于
親友案頭見有單條小幅奇花異卉寫物生動
之趣溢于楮墨方知其善于繪事而予與心山
蹤跡不甚密因未曾以尺素相求客歲聞心山
已死殊爲惻然後書友有携舊書來者云是心
山物并于雲溪友議未見心山手跋知爲文瑞
樓金星輅之孫蓋家故藏書卽散亡之餘亦不
失惓惓愛書之意用是重其人以重其物而于
是冊聊著梗槩云堯圃黃丕烈

句曲外史貞居先生集七卷

舊鈔本

厲樊榭舊藏

元張雨撰

陶宏景在齊梁時掛冠居句曲山自號華陽隱
居性雅淡愛山水每經澗谷必吟詠盤桓尤喜
著書賦詩旁通陰陽醫藥之術朝廷屢徵不起
世以高尚稱之後七百餘年當元盛時貞居以
儒者抽簪入道自錢塘來句曲負逸才英氣以
詩著名格調清麗句語新奇可謂詩家之傑出
者也當是時以詩文名世者若趙松雪虞道園
范德機楊仲宏諸君子以英瑋之姿凌跨一代

南文有集卷之六
二
諧鳴于館閣之上而流風餘韻播諸邱壑之間
貞居以豪邁之氣超然自得獨鳴于邱壑之間
而清聲雅調聞諸館之上諸君子亦嘗與其唱
酬往還雖出處不同而同爲詞章之宗匠譬如
軒輊詎知其孰先而孰後耶矧貞居博學多聞
襟懷蕭灑故大夫士多景慕而樂道之也夫隱
居貞居時世先後好尚問學似未可以同日語
然隱居之清風高節貞居之雅度逸才亦可謂
前春而後應豈非句曲山清爽之氣鍾秀于二
子歟以吾夫子中庸之道修己治人之學金聲

玉振之文昭著于天地使其學道而望洙泗之
科猶未易量也至若奔競功名蹀躞聲利醉生
夢死不自覺者則二子之風度將追嚴子陵陸
修靜之武歟易曰不事王侯高尚其事二子其
庶幾乎貞居張姓兩名伯雨字貞居其自號句
曲外史世人稱之也吳郡徐達左序

錢氏手跋曰元句曲外史集 四庫書目所載
正集三卷補遺三卷集外詩一卷共七卷是本
卷數雖同斷非 四庫書目所載之本其第七
卷內詩餘茅山逢故人至跋定武蘭亭九頁半

是厲徵君樊榭手補尤足寶貴細審其所補之
來本大約出自珊瑚網及鐵網珊瑚書畫正續
題跋記三書居多其硃筆是丁龍泓徵君之筆
無疑更所謂趙一清校則不能知其所在矣予
昔年曾見外史手書詩稿兩冊當時念念不忘
錄出一副本定然與此集大有異同之處若得
彙爲一集則爲外史全集之大觀也明虞山毛
氏所刻元人十集遂江可將是一校尤善然毛
刻斷不能如是本之富耳丁酉十二月初四日
快讀一過因爲記此夢廬錢天樹

僑吳集十二卷

舊鈔本

不括蒼鄭元祐明德撰

遂目鄭明德先生天資明敏高出倫輩其生于杭于書無不讀作爲文章抑揚頓挫反覆開闢一主乎理而氣以摠之若長江大河流衍滂沛汨汨乎數千百里而終歸之溟渤綽有古作者風旣壯來僑于吳比老乃彙其所作之文曰僑吳集授徽曰吾在杭亦嘗有作茲僑吳久而作之爲多故名焉子實見而知之者宜爲之序徽不敢辭庸復于先生曰先生固僑于吳矣夫吳

東南之一都會也山有虎阜靈巖之勝水有三江五湖之饒而遺臺故苑舊家甲第仙佛之宮乎城郭之內外民俗富而滄財賦強而盛故達官貴人豪雋之士與夫羈旅逸客無不喜游而僑焉其僑何如不過卽其山川風力之美觴詠嬉娛以各適其所樂而已烏有如先生之僑寓哉先生以吳乃讓王之封國而子游北學于孔子與聞堯舜禹湯文武周公之道得聖人一體爲文學稱首其流風餘韻未泯也斯其所以僑焉者正欲以聖賢之道資進修之益耳豈

徒藉乎山川風物以爲觴詠嬉娛之適而止耶
則先生之僑異乎人之僑也已惟其異乎人之
僑所以發而爲文亦有異乎人也雖然文豈易
言哉堯舜禹湯文武周公之文禮樂政治皆是
也蓋其道之充乎中而其發于外者無非文如
天之有氣則有日月星辰之光輝如地之有形
則有山川草木之行列文實道之顯不可歧而
二之也何子游之所以爲學絕諸子各以所見
著書是不獨文與道二而道之裂也已無有純
全者惟董仲舒氏曰正其誼不謀其利明其道

不計其功揆其行事不戾斯言可不謂其文與道一者乎而韓愈氏曰所志于古不惟其辭之好好其道焉耳是亦知夫道之與文不可二矣然以實而考之則其文固未能一出于道至歐陽修氏蘇軾氏曾鞏氏文非不能爲也豈能與道弗二乎文而一出于道惟周程張朱數君子焉觀其易通易傳正蒙本義等書簡妙精切不惟輔翼聖經而幾可與之並出其得孔孟不傳之學故能若是豈嘗拘拘學爲之文哉徽竊聞先生嘗以文師承于金華石塘胡公四明剡源

戴公此二公學羣聖賢之道者也其所以授于先生洎先生所自得有蘇曾諸氏之文而不失程朱數賢之道道未必不寓乎文文未嘗不載乎道文與道則一而子游之所以爲學者亦在其中矣奚必果僑于吳而後有所得也哉第假是以名編爾微生也後誠吳人也父祖以上居吳累世矣然于道詎有所聞而文亦莫之能措于先生豈弗甚可愧姑從命強顏爲之言是集也爲古今詩銘箴讚題書疏序記碑誌總若干篇釐十有二卷於戲有道之文當傳之天下豈

獨吳哉至正二十年歲庚子仲秋望吳後學謝
微序

張習重刊序 宏治丙辰

詠物詩一卷 舊鈔本

元謝宗可著

詩大序曰在心爲志發言爲詩則詩其心乎詩
自三百篇降漢晉以來至唐宋而聲律悉備沿
至于今蓋以義理正之風雅其道然矣本朝金
陵謝宗可爲詠物詩數百篇涵蓋精微詞必新
理必正字必工事必謹綺靡而不傷于華平淡

而不流于俗于是求公之心槩可見焉予居宣城或見之亟以念誦記而後已竊爲之評曰晉謝眺幽襟逸懷故詩多清新李賀唐王孫故詩多富貴觀公之于詩又能兼之至正癸巳汪澤民題

鹿皮子陳先生文集四卷

舊鈔本

元陳樵 **趙盧** 駢子友編輯

周旋序

正德戊寅

案鹿友子集有 國朝董肇勳刊本卷二缺出塞曲夜闌幽海人謠望夫石東飛伯勞西飛燕

五首卷首周旋序亦缺此乃完帙也

林外野言二卷

舊鈔本

元崑山郭翼字義仲撰

傲軒吟藁一卷

舊鈔本

元胡天游撰

鄧山序

弘治十二年

師山先生文集八卷遺文五卷

明刊本

元鄭玉撰

鄭子美先生所爲文予十年前嘗得其漢唐諸論頗疑其體制往往或出于繩墨心未之好也

今年復獲其師山集盡讀之觀其操議持論務
辯道理談名義蓋汲汲焉以扶植世教自見心
歎服之于是迺愧向之知先生之不能深也雖
然以文求先生非知先生者欲論先生當自其
平生大節而觀之初先生隱居于鄉教人接物
一體于風義至正中宰臣以名聞詔拜翰林待
制兼有上尊名幣之賜先生疾當世方奔競成
習將有以抑之則抗疏控辭其言曰臣問學之
淺深他人不能知臣實自知之所謂吾斯之未
能信豈敢貪冒恩榮以自欺其心酒與幣天下

所以奉陛下陛下得以私與人臣不敢辭名與
器祖宗所以遺陛下使與天下之賢者共之陛
下不得私與人臣不敢受疏聞朝廷不之強也
居無何而干戈起徽城陷焉城守者將要致之
使爲用先生厲色拒之曰吾豈事二姓者耶因
被拘囚郡中詘辱者久而志不少變親戚朋友
攜其餉之則從容爲之盡歡且告以必死狀其
妻聞之使語之曰君苟死吾其相從地下矣先
生謂曰若果從吾死吾其無憾矣明日衣冠北
向再拜自縊而卒嗚呼先生子出處死生之際

其大節表表如此而世之以文求先生者豈足以盡先生乎況求之以文者不觀其所以自見而徒徇夫言辭之末其淺知先生矣唐司空表聖韓致光所爲辭章凡近無足多者而其處進退存亡能不失其正節義所在君子蓋深許之豈可謂先生之文與行皆卓然者世其得而朽之者乎予愚夫讀先生之文者如予向之所病故竊志之以爲告世有知言者其必謂予能知人也哉先生名玉字子美徽州人洪武三年歲舍庚戌春三月朔翰林待制承直郎同知制誥

兼國史院編修官金 王禕 充書

案此序王忠文集失收

竹居詩集二卷 舊鈔本

元王廷選 國子助教郡人張信校正

張淇序 宣德元年

王進序 宣德元年

范願先序 宣德二年

李傑序 正德六年

徐謙跋 宣德二年

六世孫本跋 正德九年

友石山人遺稿一卷附錄一卷 鮑滌飲手鈔本

元靈武王翰用文 **撰**

詩者聲之文也本于內而見于外者也仁義之發醕以正忠憤之感激以烈驕侈之宣淫放僻之辭誕豈偶然之故而已哉粵自唐虞聖神以敬畏一心發而爲賡歌愼念之語成周君臣以中正一理敷而爲皇極敷言之教下迨乎三百篇之制或颯颯乎正音或末響之流變皆非有出於人心之外也戰國之間屈平氏以其忠憤奮激之心一寓于離騷之作炎漢以降蘇武諸

葛亮以其忠直義勇之氣再變爲五言之體晉
淵明得其沖淡自然之趣唐少陵寓其忠君憂
國之誠又豈有出于是心之外哉洪武庚午子
留案來閩郡庠生王偁奉其父友石山人遺稿
謁予請序其首予觀其詩毋慮百餘篇而詠于
感慨者極忠愛之誠得于沖淡者適山林之趣
已心異之而未盡知其詳及取其自快一首讀
之凜然如秋霜烈日之嚴毅然有泰山巖巖之
象出處之分明死生之理得然後知其嘗仕于
勝朝而秉義于今日故凡其所作者皆心聲之

應而非苟然眩葩組華者比且徵于予之向所
云者爲益信也噫觀是編者固可以求其心求
其心者尤當以景其行景其行則可以相忘于
言語之外矣于予言何有哉因其請之勤而感
其辭之寓遂書以歸之山人名翰字用文友石
蓋其自號也時仲春初吉前進士監察御史廬
陵陳仲述序

先府君平昔喜作詩晚年隱遯林壑尤必以此
自娛故凡其觸物感事流連光景一寓于詩以
舒其抑鬱之懷以發其憤惋之氣其作頗多第

以家不蓄藁偁自悼年爲所背棄不能一舉成
篇比自有知以來始于耆老故舊之間掇拾遺
篇粗得以上若干首類成卷帙用敢示之子孫
是雖不能盡得其詳而其志節大略亦于此焉
見耳嗚呼爲子孫者苟能因其詞而知其心則
亦庶乎凜凜然思以繼承于不墜哉歲上章敦
牂孟春初吉孤子偁謹書 玄孫焯謹錄

聞過齋集八卷

淡生堂鈔本

元吳海撰

門人靈武王偁編次進士永嘉胡甯

校正

徐起序

歲在辛巳

王侗跋

歲次辛巳

案卷首有山陰祁氏藏書之章版心有淡生堂
鈔本五字徐起王侗兩序後一題歲在辛巳一
題歲次辛巳蓋建文三年辛巳也革除之後跋
經刊改故不著年號

學言稿六卷

明弘治刊本

元

臨川吳當著

徐霖序

弘治十三年

葉天爵跋

弘治十三年

學言稿六卷

文淵閣傳鈔本

元吳當撰

北郭詩集六卷補遺一卷

舊鈔本

曹彬侯舊藏

大元澄江書院山長許恕如心撰

詩爲吟詠性情作也例以刪後無詩可乎今人之詩與古人之詩異詩人之詩與文人之詩異然詩而不以文爲法則又展于古也邈矣世之名公鉅儒騷人墨客傷人感懷物情景態吟詠之間一唱三歎而不足自非胸中有文者疇克爾耶北郭許君如心其質清以奇其學醇以正

其爲歌詩也其思深其義備性情中出固也故
古之爲詩者太白之言放子美之言憂盛世之
士其言也雍容世之亂也其言悲傷嗚呼是孰
使之然哉若如心者不遇于時不偶于世感歎
悲哀之辭見諸短章大篇中渾涵汗瀾而有流
連光景之思嗚呼可悲也已使吾如心得時行
志而爲治世之音被之樂章薦登清廟當不啻
是集之鋪張而已也如心名恕嘗用薦者起家
澄江書院山長北郭其自號也因以是名集洪
武十四年辛酉歲夏五月溝南老人里中張端

序

江陰許處士如心子卽世之若干年其仲子今
禮部主事節哀其所爲詩若干篇鋟諸梓曰北
郭集請予序之以博其傳焉噫處士之詩亦盛
矣節之用心亦勤矣然處士未始 詩之傳而
節則不忍靳其傳也世之處得其勢又能張虛
名擎浮譽者其爲詩易以稱易以稱則易以傳
也而山林枯槁之士韜形斂跡若玉在璞而珠
藏淵也苟非其光潤實有不可掩者則其爲詩
獲稱于人也難而獲傳于人也亦難矣易傳也

而或傳之不久難傳也而或久而能傳則君子
有甯爲彼而不爲此者矣大都詩之所本者情
也詩而不本于情何以謂之詩情之所著者詞
也情而不著乎詞何以達乎情詞之所依者音
也詞而不協于音何以備其詞韻是三者而後
爲詩之至今觀處士之詩玄澹冲曠其情也發
揚浩瀚其詞也流亮激越其音也是雖欲弗傳
蓋難乎其弗傳也是節雖不博其傳蓋傳之者
自無不博也而節之心則有不忍者焉此北郭
集之所以刻也序而歸之尤知處士之有子洪

武癸亥夏四月旣望將仕郎右國子監學錄吳

郡金文徵序

禮部主事許君文度持其先處士之詩曰北郭
集者若干卷求爲之序其雍容俯仰若冠冕紳
理周旋堂陛之上其縱橫馳騁若風雲蛇鳥按
兵行陣之間而其音節曲折則如琴瑟蕭瑟雜
乎竝奏而雅韻逸發也予亟讀之不暇而爲之
歎曰美哉乎處士之作也果何自而臻此予聞
山林江湖風振樹而雨垂淵其間限壘波濤與
夫石竅木穴遞爲吸吹吞吐舂撞澎湃而洪纖

廣隘徐疾以有函湖清越鏗鏘鏗鏘作止散合
引唱荅和無不中音合節天爲成而地爲設也
古人之于詩何獨不然哉其情與事物感觸有
憂愁悅豫喪離疾痛也于是焉有歎息嘯歌哭
泣呻吟之聲因其聲之韵合言之文而詩者出
焉莫非自然也夫惟自然是以不窮于研揣畦
町之間有以發其比興之微而極乎人情物理
之變今于處士之作見之矣處士鍾粹美之資
抱疏通之才執溫恭之德而抗高尚之志方鄉
邦據于僭僞時鮮不爲其用以苟升斗之祿處

士曾不屑焉盛年甘自放于海濱則其平生之情歡愉拂拂悲思慷慨觸于物者宜有以昌其詩而發焉嗟乎與處士並世而遷就委曲取富貴者非不得時名而爲閭里之所艷距今才二十年泯焉與草木同腐者其人往往處士雖布衣沒齒自其在時負能詩聲旣沒而有賢子若文度者發其遺稿彙次成帙刻梓以傳處士之名固當與是集並存天壤間矣以其所得者計之其所取造物果孰優乎哉是爲序洪武十八年歲次乙丑三月六日前史館眉山蘇伯衡序

古人謂置心平易始知詩況爲詩乎浩然欲立
萬物之表藏于無端之紀是慕空虛耳非平易
也屑屑然與世俗是非相勝負囿之而莫脫是
恆陋民耳非平易也惟高不絕俗近不遺理喜
怒在物死生優游廓之通造化斂之存方寸始
爲得之若晉之陶淵明是也故其詩澹然無作
隨意而成言不離乎人世而與至理相涵若風
之鼓物虛實相應自成律呂識者聽之謂不異
韶護其後力欲效之者惟韋應物柳子厚應物
唐史不載其爲人不可得而知子厚少年冒進

酣豢富貴胸中固非泊然自靜者矣及投荒裔
居閒漱滌其辭雖清吟可愛而憤激不平之意
時泄于其間果足得淵明心乎不得其心而逐
其辭雖子厚猶不能至況不及乎吾以是知學
淵明者莫若得其心辭非所論也當元盛時取
士之途甚狹士大夫不由科舉惟從吏而已積
月累時求一身榮耳雖間有長才善策迫于其
類亦無從施故有志者不肯爲也甯往往投山
水間自樂其所有如北郭先生其一也先生少
以文學著名用薦者起身爲澄江書院山長不

樂卽弃去浩然自得與山僧野子相往還乘風
詠月人莫測也其爲詩一出自然讀之愈久而
意愈無窮固不暇如世之粉藤一解一句取媚
人口此善學淵明者也雖然淵明當晉室告終
力不能救其詠吟茅茨之下固非得已也先生
亦豈隱者使言行計從當與古人有爲者竝今
抱身而去獨得已乎讀先生之詩則先生之爲
人可知矣先生諱恕字如心江陰人也其子節
今爲禮部主事學行無愧于先生云洪武十有
八年歲在乙丑春正月旣望天台林右序

玉笥集十卷

舊鈔本

元會稽張憲思廉

撰

劉鈺序

成化

劉江序

今釋跋

張煥采跋

鶴年詩集三卷

舊鈔本

宋賓王校

元丁鶴年撰門人四明戴

櫻

脩江向

誠

信

道

大

曇鐙編次

昔者成周之興肇自西北西北之詩見之于國

風者僅自邠秦而止邠秦之外王化之所不及
民俗之所不通固不得繫之列國矣我元受命
亦由西北而興西北諸國若回回蕃康里畏我
兒也里可溫唐兀之屬往往率先臣順奉職稱
藩其沐浴休光霑被寵澤與京國內臣無少異
積之既久文軌日同而子若孫遂皆舍弓馬而
事詩書至其以詩名世則貫公雲石馬公伯庸
薩公天錫余公廷心其人也論者以馬公之詩
似商隱貫公薩公之詩似長吉而余公之詩則
與陰鏗何遜齊驅而竝駕他如高公彥敬樓公

子山達公兼善雅公正卿聶公古相幹公克莊
魯公至道二公廷主輩亦皆清新俊拔成一家
言此數公者皆居西北之遠國其去邠秦蓋不
知其幾千萬里而其爲詩乃有中國古作者之
遺風亦足以見我朝王化之大行民俗之丕變
雖成周之盛莫及也鶴年亦西北人其視數公
差後起家世以勳業著而鶴年兄弟俱業儒伯
氏之登進士第者三人鶴年乃泊然無意于仕
遭時兵亂逃隱海上邈不與世接凡幽憂憤悶
悲哀痛苦之情一于詩焉發之觀其古體歌行

諸作要皆清麗可喜而注意之深用工之至尤在于五七言律但一篇之作一語之出皆所以寓夫憂國愛民之心愍亂思治之意讀之使人感憤激烈不知涕泗之橫流也蓋其措辭命意多出杜子美而音節格調則又兼得我朝諸閣老之所長故其入人之深感人之妙有非他詩人之所可及嗚呼若鶴年者豈向數公之流亞歟然數公之在當時皆達而在上者也世之士子孰不膾炙其言辭鶴年遭夫氣運之適衰方獨退處遐陬而爲所謂窮者之詩以自慰其能

知夫注意之深用工之至者幾何人哉知與不知在鶴年未足輕重第以祖宗涵煦百年之久致使遐方絕域之詩俱得繫之天子之國而鶴年所以著明王化民俗之盛以與數公竝傳于斯世者將遂泯無聞矣不亦重可悲夫故取其吟藁若干卷序而傳之以俟世之知鶴年者相與諷詠焉耳鶴年之清節峻行已別有傳茲不著至正甲午秋九靈山人金華戴良序

太學生戴習錄其師鶴年先生詩曰海巢集者請題其後鶴年子友也其詩忠義慷慨有騷雅

之遺意焉昔唐之僧有讀其友盧仝之詩者曰
鯨吞海水盡露出珊瑚枝海神知貴不知價留
與人間光照夜吾讀海巢集亦云生其寶之生
其寶之虎邱澹居老人至仁書

宋氏手跋曰丁鶴年詩向無刻本轉相鈔寫譌
字頗多雍正丁未端陽後一日得秀水朱竹垞
翁所藏明正統間刻本于吳郡桃花塢文瑞樓
兩窗較閱刻本亦微有譌字前明蕭山魏驥序
之賓王較并記

案此集係竹塢文氏家藏後有文點與也圖章

鶴年詩集三卷

元刊本

徐興公舊藏

元丁鶴年

門人四明戴

稷

脩江向

誠

方外

曇銓編次

徐氏手跋曰予嚮家藏丁鶴年詩三卷乃永樂間刻版後有廬陵楊文貞士奇跋語紙墨古潔予珍惜之斯本爲元版亦分三卷簡首有高惟一印章惟一國初人有孝行事詳郡志二本俱善因合藏之萬厯丁未春正月三日徐興公題案此元刊本每葉二十行每行二十字卷中有岡中徐惟起藏書印朱文長印徐勛之印白文

方印徐氏興公白文方印卷面有興公手書丁鶴年徐氏汗竹巢珍藏本元版十四字

丁鶴年先生詩集三卷

舊鈔本

勞翼卿舊藏

元丁鶴年撰

勞氏手跋曰丁鶴年詩從宋賓王校本傳出隨校一過原本卷首四番及序跋補遺詩皆賓王手錄卷中誤字尙有塗鉛未補者俟再值本校之癸卯九月四日鐙下書于玉參差閣臥室龔卿

臨宋樓藏書志卷一百七

存齋雜纂之六

歸安陸心源剛甫編

集部

別集類四十一

青村遺稿一卷

舊鈔本

元劉涓子

董期生序

嘉靖三年

胡森跋

黃端序

黃宗明跋

貞素齋文集八卷附錄一卷附北莊遺藁一卷

舊鈔本

元舒頔道原撰

予蚤歲浪游湖海間所作益多求其合于體者
蓋寡因其寡而嘗致極思焉自壬辰寇變家藏
譜畫書籍與所作舊稿蕩然無遺雖居離亂中
艱難險阻千情萬狀獨于詩未嘗忘情復盈數
帙自題曰古澹華陽藁貞素齋集不遇其所歷
所見爲異時話柄四五年間妖孽未除兵革未
息出處未甯東奔西竄又復零落當飢寒鬱悒
不堪于懷發而爲哀怨憤切之語關于風係于

世事樂見于辭雖無匡救之直而忠愛之意惓
惓然一飯不忘然則三百篇不作則治亂風刺
之義不幾于息乎予之所作雖未合于體契于
道或者有時闕于時設未盡善尙俟夫後之知
音者訂正云洪武辛亥冬十月六日華陽逸者
舒頤道原甫序

趙春序

嘉靖庚子

戴嘉猷序

嘉靖庚子

胡富序

正德戊寅

胡文彬序

嘉靖庚子

裔孫朝陽序 嘉靖庚子

徐銘跋 嘉靖庚子

方桂薰跋 同上

章瑞序 正德戊寅

黃槐跋 嘉靖庚子

裔孫泰跋 正德戊寅

汪用章序 嘉靖庚子

七世孫旭跋 同上

八世孫孔昭跋 同上

江月松風集十二卷 文瑞樓鈔本

元錢塘錢惟善思復撰

錢塘錢思復好學而有才當壯盛之年未嘗有
紛華之悅予見其詩益知其爲人思復知予之
知之也悉出其生平所著者以示予何其妥適
清雋娓娓乎有唐人之遺風焉夫詩本於性情
之微觀其音響韻致可以知其蘊於衷者苟同
於利欲而受變於世故之糾紛雖飾其言以爲
詩固不能逃乎識者之目矣思復養於內者完
而接於外者不雜故其發於言者若此嗚呼詩
豈可強爲之哉予蚤歲亦嘗有志於是顧爲貧

所驅奔走埃壒之涂蓋久矣安得從思復日襄
羊於雲煙水石間以陶寫吾之所得於天者乎
至元後戊寅正月十日陳旅序

詩工於景物至晚唐四靈殆已無可掇拾皇宋
涉於議論遂謂議論非唐詩少陵就 時事議
論亦多耳論者若置少陵於唐詩外豈三百篇
性情議論者非耶常人狃於所習近時又倡爲
對偶排比以爲律政如木偶人衣冠儼然而無
生氣流動謂可以與言詩乎錢思復所作特妙
未嘗不議論而不口於議論未嘗不景物而不

晚唐四靈於景物亦浣花溪上見白頭亂髮兩
耳人耶予嘗謂少陵詩詩則律意則不律以詩
律其不律之意以不律之意律其詩莊生斲輪
手蓋自有不可言傳者至論格高語響如居仁
邠老猶是第二義耳有能於此觀思復者自是
一流具法眼人至元五年春三月十六日溍安
夏溥書

翁氏手跋曰江月松風集爲有元錢思復手書
稿草先民筆墨具有別致好事者因裝裱成冊
錢罄室曹秋嶽相繼收藏秋嶽亡後伯兄駕澂

于金閭見之傾囊得歸一時爭相傳寫未免有魚豕之誤此本乃予手鈔較對獨細惜有關脫無從攷補至字畫間有舛誤亦從闕疑大抵古人手筆當仍其舊不可妄以己意增損也所得更有張伯淳貫酸齋書卷元人草元閣湘竹龍唱和并雜詩束共此集爲三冊得于康熙丙寅之杪春而鈔成于季秋之十三日東洞庭山又張翁杖識

江月松風集十二卷

舊鈔本

元錢塘錢惟善思復撰

陳旅序 至元戊寅

夏溥序 至元五年

一山文集九卷 舊鈔本

元進士翰林院檢討東安李繼本撰

黎公穎序 景泰癸酉

龜巢摘藁三卷 元人鈔本 曝書亭舊藏

元謝應芳撰

昆陵謝先生昔避地吳松之上予適自燕至吳
予友涿郡劉子南氏嘗道先生姓名學行之懿
予願見而未暇焉後十年識先生之仲子于崑

山則先生已歸隱於毘陵矣又十年婁東袁子英氏以先生年八十邀予賦詩爲先生壽繼又告曰先生之門人主著集先生之詩鋟諸梓先生摘其詩之什一與之凡若干卷名龜巢摘藁復徵予序卷端予辭以未識先生又未嘗閱先生之詩集何敢率爾從命且衰退不敏又何能贊一辭於其間哉予言又豈足爲先生軒輊哉然子南旣稱先生於前子英復頌先生於後況嘗與先生之子林連牀累日觀其從容詩禮秀拔儒林則先生之言行可知已傳曰不知其人

視其友不知其父視其子又奚必識先生之面
誦先生之詩哉嘗聞先生之爲人耿介尙節義
與世寡合其爲詩也非有關於風教者不爲也
非有得於情之正者不 也惜先生不少試其
才於時肥遯以終身焉先生有辯惑四卷行于
世皆發先儒所未發其於後學豈小補哉予始
述所聞者如此先生名應芳字子蘭號龜巢云
時洪武十二年歲己未七月旣望前江浙儒學
副提舉豐城始豐山人余詮序

文章與時高下昔人有是言也有能處憂患顛

沛之中不爲外物之所搖奪形於言辭無感迫
憤懣之病有異於昔人之言者惟君子爲能之
吾於子蘭先生之文見之矣先生蚤有俊譽嘗
爲晉仲俞用中諸公所知生平重然諾勇於
爲義紬繹經史作爲文章咸有根柢與人論辨
不少休在鄉里時請復鄒忠公墓寓吳中
又請作顧元公廟世俗怵於異端邪說先生因
取經傳之言作辨惑編以警之其襟度磊落識
見雅正實爲士林所推重洪武十年冬先生元
子林以郡府所舉至京師先以書諭熊曰某有

舊作學子王著願板刻之乃爲摘數十篇以從
其請子其序之庶不爲醬豢矣曩先生避兵時
雖漂搖逆旅中所至人欽其德望延致恐後巢
室松江之旁講授之暇聊以詩酒自娛熊託交
十五六年一時倡和若楊維禎廉夫倪瓚元鎮
顧瑛仲瑛俯仰之間淪落泉壤先生年逾八十
歸隱橫山實爲後進之所 其所著述有不
期於傳而自傳者矣吾友中書舍人閩人張至
道評先生之詩雅正純潔法度整嚴可與傳與
厲相伯仲識者以爲名言熊竊窺先生養之厚

氣之充言行卓卓如此蓋喜聞而樂道之者因以冠之篇端先生姓謝氏自號龜巢老人因名其集爲龜巢文藁云范陽盧熊序

龜巢藁十五卷補遺一卷

舊鈔本

元毘陵謝應芳承甫著

石初周先生文集十卷

舊鈔本

元周霆震撰

文章之在古今猶天地之元氣未嘗一息閒也論者謂文章繫乎世運盛則盛衰則衰是未足爲知斯文者世運盛文章固與之俱盛及其衰

也文章不與之俱衰何也盛而非文之用不能
以致治衰而非斯文之未喪何以扶當世之衰
後來之盛乎蓋盛而衰衰而復盛者世運之常
文章與天地竝不隨世運也是以文章顯而世
運爲之盛文章藏而世運爲之衰顯顯於天下
藏藏於人心藏其本也故凡文章之顯於天下
者皆藏於人心者爲之此乃人得之於天所以
合元氣以御世運者世運豈得而盛衰之哉然
顯者天下共知而尊之藏非知道之君子未易
與語此也烏乎廬陵能文章者尙矣近遭世亂

儒道幾墮今英材輩出各以其所能詩若文自
高而不知有應俗之慙其將何以極之乎同郡
周石初先生績其世學而介然自守其爲文爲
詩有古意有奇氣能使人讀之興起而隱居深
藏不妄交不求名故雖老成而人鮮識之者余
以爲當此之時得如先生數輩以激昂後學使
有所法庶幾鄉國有天下士以鳴聖朝啟運之
隆而古文復倡於茲豈不足爲廬陵光而未見
有志之同者豈天無意於顯者而猶有待耶然
則先生之文與詩何可使晦而弗彰乎至是先

生之門人晏彥文編錄爲集且道先生之命欲予爲之序予昔雖嘗學於鄉先生之能文辭者未能今又窮處而耄及何能與於此而先生獨不鄙夷之意者天將復顯斯文與先生其知我矣於是述愚所見附於集之末以俟夫能古文而顯者以質其然否焉洪武癸丑孟夏初吉老友劉玉汝成之書

陳謨序

洪武六年

粵若稽古太上有立德其次有立功其次有立言聲之精者爲詩詩之精者爲雅爲頌古今詩

人之窮無如子美精於詩者亦無如子美顛倒
短褐到處悲辛信窮矣致君堯舜自比稷契詩
能窮之乎周公思兼三王制作雅頌詩之精者
也吉甫作頌穆如清風亦詩之精者也詩不能
窮人也謂子美以詩而致窮且不可謂古聖人
而窮於詩可乎同郡周石初先生當不諱之朝
必以窮經爲事必以舉進士爲業然天不能使
人材不出於科第亦不能使人材必盡出於科
第惟材力時命適相值者迺無往不逢耳用是
坐廢而先生之門受業滋多先生之文日益富

矣予觀唐宋諸大家工於詩者每不足於爲文
文不兼詩詩不兼文而先生獨能兼之也迄二
十年兵革之禍旣裂冠燬冕斷腸招些未之前
聞予所覩記石壕新安彭衙之類在治忽者往
往有足徵焉而先生一飯不忘君之意惓惓忠
愛溢於言外此先生之文之必傳於永久無疑
也嗟夫士窮則修於家不窮必功覆斯民然後
出孔明所師者龐士元司馬德操所友者崔州
平徐元直石廣元孟公威假令南陽秉耒不釋
則索然俱爲陳迹矣世豈知有伊呂之事哉然

則先生之不遇其志亦可悲矣先生命其孫安卿從予正葩之學且挾此稿來就予評予故舉魯人之論古之死而不朽者以獻焉洪武七年甲寅中秋日葛化誠夫書

石初周先生予四十年前友也長予十歲始定交於桂隱劉先生之門時方銳意場屋累試有司不偶乃歛其英華發爲詩文雄偉俊邁自成一家有金玉之音無脂韋之態深爲諸老所器重旣而世變紛紜東西奔竄比年復客城西年逾八十老氣崢嶸顧當時輩行惟予一人存更

唱迭和議論縱橫累日不厭教授子弟必道彝
倫之言平生詩文千百篇厄於灰燼此編特兵
後感時觸事之作不輕以示人間出與子評予
竊觀其學問文思度越輩流且賦性剛介擇交
寡言晚生後進多不知其所爲亦不屑與之語
侵尋莫景歷艱涉危猶傲睨一時決不肯阿順
苟容其胸中所養如此故發爲詞華如風雷振
蕩長江大河令人悚敬而不可涯涘不必循規
蹈矩而藹然溫和不必扼腕張拳而凜然激烈
沈著痛快慷慨抑揚由其平日淹貫諸大家積

之旣深發於毫端皆渾然天成類非勉強步驟
所能及嗚呼近時詩文一變蹈襲梁隋以夸淫
靡麗爲工纖弱妍媚爲巧放肆驕汰傲然自謂
古之人厚誣當時以誑惑聾瞽是皆先生之罪
人也先生之學切於爲己先生之心樂於及人
其素所樹立如予者豈足爲輕重哉特有感於
風化之移易鄉之隱君子相謂曰石初氏端莊
不矜語必已出生平孤介自信深堅非其人竟
席不發一談若可與言輒盡情傾吐然傾吐時
甚少故流輩多不合晚遭世變足未嘗入城關

一步名不挂投贈卷中惟教授諸生夜分忘倦
蓋其天性然也閱視悲歌慷慨由少陵忠愛根
之詩道陵夷首倡正論古風不泯伊誰之力哉
斯言也得其彷彿故述之庶足以質予之非誇
云歲次玄默困敦律中蕤賓重午日老友梅間
張瑩書

石初周處士文集諸老先生旣序之詳矣處士
孫安卿提舉徵言于堅堅何足以知之竊讀處
士行狀墓銘作而歎曰當元盛時處士以舉子
業試不利乃絕意進取專力古文辭爲一時名

士所推尙向令躋一科授一職則倥傯簿書期會間何暇于文且文者氣之發于辭而成章者也處士爲人剛介而和易接物居貧無戚戚容而誨人則如不及晚遭兵亂韜晦名跡守善自信不求人知其蓄德操行如此宜其發于文也不澆而遁不華而質隱然有閭時病俗愛君憂國之誠焉詩曰雖無老成人尙有典刑處士往矣而安卿以文學授官食報伊始而惓惓于斯集不惟足以想見處士風采亦以知周氏世澤深長也子孫世寶之哉敬以是書于集後洪武

辛酉夏六月望晉安林堅謹書

周

跋

萬曆十九年

周泰跋

正統十年

彭時商輅劉宣夏時正跋

成化九年

山窗餘稿一卷

明初刊本

元餘干甘復舊

趙琥序

成化癸卯

甘復先序

成化丙午

梧溪集七卷

明初刊本

汲古閣舊藏

元江陰王逢原吉撰

太平王生光大以徵江權歌詩求子序其端且
曰是詩江陰王原吉作也原吉與子同姓同業
學詩於延陵陳漢卿陳與柯敬仲俱事邵庵虞
公得其傳邵庵蔚然儒宗爲時名臣柯參書奎
章閣卒陳今爲東流尹亦躋顯仕原吉窮而在
下能自以詩鳴家居徵江志樂漁隱因以目其
詩初光大得之永嘉陳昌道氏併日夜讀一再
過竊中於心光大事先生久與原吉姓同業同
而其志又同願受一言以爲評噫詩言志無間
於古今無分於隱顯也當堯舜時朝廷有賡歌

之美康衢有擊壤之謠古詩三百篇國風雅頌
皆然漢魏而下舍其心志工其文辭迄於宋季
滋甚我朝疎齋子昂能五言曼碩善歌行邵庵
長於律三四公繼作一洒宋季之陋竝驅晉唐
駸駸乎漢魏而逮於古矣雖然學古有道生歸
持其志養其氣使德存於心而言出諸口志之
大者其氣滄以清其辭婉而直其聲舒遲而旨
意無窮誠如是不期古而古何待有爲哉且予
聞文章與風俗相推移觀激江權歌則盧趙虞
揭三四公之力昭昭矣原吉守漢卿之學宗邵

庵之傳博以三百篇之趣權歌春申山水間發
情止義不古也哉惜予老不能振之也然聽歌
滄浪觀風康衢必有審音者原吉其不鳴天朝
而賡歌於上矣乎於乎有所譽者有所試也倚
歌而和之樂善有誠也聽其言而知其德觀其
志而審其有爲古之人皆云曾謂我媚夫人乎
哉王生其懋之生請書其言遂爲序至正丙戌
夏新安汪澤民書

士莫先於尙志志之所在言行著焉考其行諦
其言可以知其志矣世微道息旣不可潔身以

亂倫又不可忘世而獨善飭躬修辭中慮中倫
高尚之志隱然可見斯得不謂之君子已乎吾
讀梧溪集而得其人焉曰江陰王逢原吉父原
吉氣清而才茂學治而行檢優談論富謀畫弱
冠獲譽士林嘗稱疾牢辭臺臣之薦人咸高之
遭時多虞以客爲家大府交辟一不就迴翔州
里能以一言活黨亂者數千人之命以一檄降
惡少五千之眾又聚瘞無錫之殲於兵者千百
人之齒豁力可致者不少恡嗇與之語恂恂也
至於去就之辨三公不能易其介三軍不能奪

其節故其吐而爲歌詩也一則闡彝倫之大一則裨幽潛之光一物一事之詠未嘗不重致其憂思慨歎焉其辭婉而諷其旨微而貞蓋有得夫六藝之蘊植於事爲者如彼發於詞章者又如此所謂中慮中倫者非歟於乎行藏顯晦士之大致也有義存焉以原吉之才之學無施不可又非無相知者其不願仕者志也志豈異於人哉惟其義而已吾誦其詩不惟嘉其志而又有感焉白駒考槃不圖見於斯也原吉中年築草堂于松之青龍江上以吟詠自娛追惟其大

母徐夫人嘗手植雙梧故里橫河之上今世遠
地殊因自號梧溪子示不忘也故集以是名其
殆自混於天隨玄真之流乎雖然其視枉己而
舍義者奚啻天壤異時如傳逸民吾必以原吉
爲魯仲連之列至正己亥仲秋番陽周伯琦書
世稱老杜爲詩史以其所著備見時事予謂老
杜非直紀事史也有春秋之法焉其旨直而婉
其詞隱而見如東靈湫陳陶花門杜鵑東狩石
壕花卿前後出塞等作是也故知杜詩者春秋
之詩也豈徒史也哉雖然老杜豈有志於春秋

者詩亡然後春秋作聖人值其時有不容已者
杜亦然梧溪集者江陰王逢氏遭喪亂之所作
也予讀其詩悼家難憫國難採摭貞操訪求死
節網羅俗謠與民謳如帖木侯張武略張孝子
費夫人趙氏女丙申紀事月之初生天門行竹
笠黃官柳場無家燕諸篇皆爲他日國史起本
亦杜史之流歟逢本山澤之士其淡泊閑靜是
其本狀而有春秋屬比之教故予亦云春秋之
詩也採詩之官苟未廢也則梧溪之春秋得以
私自託也不然何其屬比于冊者班班乎其無

諱若是也訂其格裁則有風流俊采豪邁跌宕
不讓貴介威武之夫者兼人之長亦頗似杜吁
代之勦故殘餘欲傳于世稱爲作人而逢詩不
傳吾不信也至正十九年冬十一月初吉會稽
楊維禎書

顧氏手跋曰鮑丈瀑飲向欲刊行梧溪集知毛
子晉所藏在先從兄抱冲小讀書堆屬予勘定
而未果也今丈已下世令嗣規續成先志以作
知不足齋叢書之廿九集深嘉厥意從望山姪
借出竭三旬力補改傳鈔闕誤惟是六七兩卷

板心有粉墨塗改痕跡於次第頗舛錯蓋景泰板模糊斷爛致有此失又悉爲之推求訂正庶幾稱善矣然終少七卷第四葉故其三葉末節石銘題下梧溪自注云有後序而今俄空焉此集在毛氏時已難得錢曾敏求記具言之予并見汲古別本鈔刻各半者此兩卷尤舛錯脫落相較殊遜不知世間尙存洪武印本可足是一葉以成完璧否也校旣畢遂誌於尾而歸之時嘉慶丁丑歲顧千里書

案此元刊明印本每葉二十六行每行二十二

字卷中有元本朱文腰形印印子朱文方印毛
晉之印朱文方印毛氏子晉朱文方印文瑞樓
白文方印秋夏讀書冬春射獵白文方印汲古
主人朱文方印毛晉私印子晉朱文二方印毛
展之印朱文方印斧季朱文方印蓮涇朱文方
印太原叔子藏書記白文長印

梧溪集七卷

周研農手鈔本

池北書庫舊藏

元江陰王逢原吉撰

汪澤民序

至正丙戌

周伯琦序

至正己亥

楊維禎序

至正十九年

王氏手跋曰梧溪集七卷乃景泰七年丙子南康府知府陳敏政重刻陳刻後序述原吉家世甚詳原吉有子掖洪武初任通事司令轉翰林博士兼文華殿經筵事卒官掖子徠嘗以才德薦至京師未官而卒子輅宣德中以秀才舉授南康府照磨未幾卒二子曰顏曰孟不能歸遂僑居星子之東澗祖母黃母徐躬紡績以教二子俱有成云集首有至正間周伯琦汪澤民二序序言原吉初學詩于延陵陳虞卿虞卿與柯

敬仲俱事虞邵庵得其傳與有元盛時楊范諸
公齊驅惜未著其名俟再考之虞卿官東流尹
亦序云漁洋山人跋

又曰元席帽山人王逢梧溪集七卷壬申歲門
人楊庶常名時所貽江陰老儒周榮起研農氏
手錄本也書學鍾太傅稍雜八分終卷如一研
農壽八十有七乃卒今歿才五六年耳

吾吾類稿三卷

文淵閣傳鈔本

元吳皋撰

胡居敬序曰強圉作噩之祀予還江右抵臨江

假寓天甯寺寺密邇郡庠因與教授吾吾吳先生舜舉游先生嘗語子曰郡承大亂之後民皆習武事厭儒術學宮雖存絃誦絕響教無所敷吾甚恥之旣而時異事殊先生屏居閭里闢一室績學藝文惟以奉親訓子爲務勢利紛華之習眎之漠如也郡存罹兵變干戈相承學宮荒閤袁筠之境遺民逸士聞先生名每延置其家奉贄請益雖武夫悍將多遣子弟就學焉四方縉紳大夫求詩若文戶屢恆滿平居無事操觚染翰著述不厭境與意會必形之吟咏學者多

傳誦之遭時多難竟齋志以沒惜哉先生沒十
餘年其子均彙次遺稿屬爲序予嘗見先生文
集篇帙甚富今所存僅若此蓋掇拾于喪亂之
餘不能全也先生之文典實古雅從容于法度
之中其爲詩沖淡和平發乎性情之正世之工
乎侈靡浮麗以流連光景嘲弄風月者不可竝
論也先生世家臨州履齋丞相之諸孫也蚤游
吳文正公之門獲聞聖賢之學故處乎叔世卓
然不易所守使得位而見諸用其事業必有可
觀也詞章云乎哉均字仲權好學而文能守其

家學云

梁寅序曰予留郡城獲觀吳舜舉吾吾先生詩
尤妙于五言如竹林清颿頓蘇煩鬱如蘭皋秋
露負殊塵境因歎曰詩形于音音生于心心有
所辨音乃中節先生之詩中節之音也而予未
能知之憶予弱冠時與先生同處豫章郡庠爲
弟子員予之學未知方志有不定因謂人皆然
固予之愧也後三十年先生爲臨江郡博士遂
屢見之以急遽流離未暇考德問業知先生未
盡又可愧也後又二十餘年而先生沒矣而始

獲盡觀其詩文皆亶亶古人乃大愧焉以五十年之交友而知之未能盡何也其失原于自怠而闇于知人也嗚呼白首巖扃舊交零謝欲求如先生者與之上論風雅而下評近作其可得耶先生之子均以先集見示凡先生行事前進士胡君居敬序之詳矣予書此于後姑以見慕之之至而愧之之深也

詩權輿於康衢之謠賡載之歌而大備于成周之風雅頌後世雖有作者不可及已邵康節云自從刪後更無詩非無詩也無古人之詩也非

無古人之詩也無古人之性情也五言起于李陵蘇武七言起于漢武柏梁詩之爲體非古也絺章繪句嘲風弄月詩之爲教非古也夫以古人之詩如彼而今人之詩如此謂之無果無詩哉其間有能以今人之詩體而寫古人之性情則詩之爲教猶有存者然文章與時高下漢魏之詩猶近于古下至六朝則綺麗之習勝而漢魏雄渾之氣亡矣迨夫聲入于律而絕句八句排律之作則號爲近體而拘拘于對偶婉青配白爭以纖巧新奇爲尙去古益遠然時之所趨

其可少乎臨川吳舜舉先生蚤知學詩而能上
追三百篇之義作爲五七言古近二體諸詩皆
本乎性情關乎世教非汎汎而作者前嘗爲臨
江郡博士其淑之人者多矣亂離以來全稿散
失其子均收輯遺篇于亂定之餘僅得若干首
臨江稅課司大使京兆趙君師常見而說之遂
率郡中士友命工刻梓以永其傳以予與先生
相知之深徵序其端予不敢辭張美和序